

Automobilists pli attents

Grischun: Statistica dals accidents da traffic 2018

■ (anr/gns) Sin las vias dal Grischun èn capitads durant l'onn passà 2213 accidents da traffic. Total èn quai set accidents damain. Ils accidents sin via, cun ina fin mortala, èn sa diminuìs. En tut han pers 13 persunas lur vita. L'onn avant eran quai anc 19 cas mortals. Il dumber da las persunas blessadas è er sa reduci e quai per 10%. Dapi il 2015 è Barbara Hubschmid scheffa da la polizia chantunala da traffic dal Grischun. En il decurs da primavera daventa ella scheffa da la polizia chantunala criminala. Da preschentar sia davosa statistica dals accidents da traffic en noss chantun, cun cifras pli plaschaivlas, saja bain er per ella ina chaussa positiva, ha punctuà Hubschmid.

Bunamain 159 000 autos en noss chantun

L'onn 2018 ha la polizia chantunala registrà totalmain 2213 accidents da traffic en il Grischun. En media correspunda quai pli u main al dumber d'accidents dal 2013 fin il 2017. Cun resguardar ch'il dumber da vehichels a motor en il chantun Grischun è s'augmentà l'onn passà per cira 1800, sin da nov 159 000 autos, dastga quai vegnir considerà sco positiv, ha ditg Hubschmid. In fatg plaschaivel saja ch'il 2018 hajan sis persunas damain pers lur vita sin via en cumparaziun cun ils 19 cas mortals en il decurs da l'onn 2017.

Suenter intgins onns sut 600 cas

Cun 592 persunas blessadas è quel dumber sa diminuì per 10%. Da quellas persunas blessadas eran 99 grevblessadas, ditg pli concret 14 dapli che anc l'onn precedent. En cumparaziun cun la media dals davos tschintg onns è il dumber da las persunas blessadas grevamain vegnì per 16,4% pli aut. Il dumber da las per-



Han preschentà bunas cifras en connex cun ils accidents da traffic en noss chantun: Roman Rüegg, il schef da medias da la polizia chantunala dal Grischun, e Barbara Hubschmid, per intginas emnas anc la scheffa da la polizia chantunala da traffic en noss chantun.

FOTO G. N. STGIER

sunas lev blessadas, quel è lura sa reduci da 560 dels sin 493 dels. Remartgabel è bain ch'il dumber da las persunas blessadas giascha il 2018 dapi intgins onns sut 600 cas. Da la summa totala dals accidents da traffic èn 1356 capitads sin vias principalas. Ils accidents sin las autostradas èn s'augmentads levamain. Il 2018 han 1929 persunas già da dar giu lur permiss da manischar almain per in mais. 287 dels han pers per in temp lur lubientscha da manischar cun avair già memia blier alcohol.

Damain accidents mortals cun motos

Il dumber d'accidents cun motos è sa reduci levamain en cumparegliazion cun

l'onn precedent. In fatg allegraivel è en spezial la diminuziun tant tar las persunas disgraziadas mortalmain (-3) sco er tar las persunas blessadas (-6). In ferm augment hai percenter dà tar ils accidents cun e-bikes (dad 11 a 29) sco er tar las persunas blessadas en tals accidents (da 10 a 24).

Ina tendenza cuntraria vegn constata da tar ils accidents cun velos e tar las persunas blessadas en tals accidents. Là è il dumber d'accidents sa diminuì da 70 a 58 ed il dumber da persunas blessadas da 61 a 48. Sa diminuìs èn er ils accidents da pedunas e peduns (-10) ed il dumber da persunas blessadas en tals accidents (-10).

Sveltezza memia auta e distracziun sco ristgas

260 accidents da traffic èn capitads pervia da sveltezza memia auta. La diminuziun per var 7% po esser in indizi che l'activitad da controlla pli intensiva è sa cumprovada en quest sectur.

Che la distracziun en il traffic sin via è er vinavant in problem e signifitga ina gronda ristga sa mussa a maun dal fatg che circa 135 da tut ils accidents da traffic èn capitads pervia d'in'attenziun e pervia da distracziun.

Tenor regiuns èn il pli blers accidents da traffic succedids a Cuira e cunturn, en Surselva ed en la Val Alvra/Surses.